

- 11 Schoon lief, is dit mijn recompense?
Gy hebt my doen ter vierschaer gaen
Vier of vijf werf, om mijn sentense,
Daer ick vijf uren heb lang gestaen.
- 12 Schoon lief, als gy dat volck siet loopen,
En gy hoort dat ick sterven moet,
Soo compt met eenen stoope gelopen,
Versaet u lief met mijnen bloet!
- 13 Die doot en soude ick niet beclagen
Dat sy my door een ander quaem;
Maer nu valtse my swaer om dragen,
Om dattet, lief, compt door uwen naem.
- 14 Schoon lief, wat sijt gy voor een vrouwe?
Hoe heeft u Nero soo verblind?
Gy woudt wel dat men sijn hoofd af houwe
Die gy hadt neffens Godt bemint.
- 15 Waer is nu allen u caresse?
Waer is nu soo menigen eet?
Gy swoert te wesen mijn maitresse,
Wie dattet lief was oft leet;
- 16 Ja om vader oft om moeder,
Oft om mijnen naen (naem) voordaen,
Noch om suster noch om broeder,
U schoon lief niet af te staen.
- 17 Wat baten my u sneeuwitte handen
Al sijn sy suyver en delicaet?
Gy dect my eer gy ontdekt mijn schande,
Gy schrijft daermede mijn misdaet.
- 18 Maer als ick peyse op dese schoon woorden,
Waermede dat gy my hebt verdooft:
Maer nu toondy my sulcken discorde!
Och lief! ick en haddet noyt gelooft!